

## TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

*Pablo saruhuatasacari Pueyaso pueya maanu Corinto tiacajinia*

<sup>1</sup> Janiyari Pablóni. Pueyaso panishacari, janiyari Jesucristo jiyaramiquishanora jiyatesaaquiaari na rupaa cua poojotanurani. Janiyari Timoteota naajiya nio ni-aacuarani. Nojuajaari parta Pueyaso pueyano. Canaari Corinto tiacajinia quiniaa Pueyaso pueya maanuucuaara naajiyani, puetunu Acaya jiyajinia Pueyaso tojitiajaca pueyacuarajanaanio. <sup>2</sup> Pa Que Pueyaso, mariyata pa Jiyaniijia Jesucristo cuaara cumaquiiria niajaniya. Nojori cuaara jiyateera niajaniya juhuajaniya quijiaca nia quiniuria.

*Pablo miishacari naquiya*

<sup>3</sup> Pa Jiyaniijia Jesucristo Que pa shuquiritiare. Nojuajaari pa Quejuhuaj, pocua taraajeja cutara. Nojuajaari pa Pueyaso, pueyaracaanu pa cumanijiana. <sup>4</sup> Nojuajaari pueyaracaanu pa cumanijiaquiaa naquiya pa miishacari. Naacuajiti pa naata cumanijianu tamasacajuhuaj, naquiya nojori miishacari, taa Pueyaso cumanijiaquiaa pajaniyacuaani. <sup>5</sup> Seetanujuanaa, Cristo rupuejaca pa quishacari, paari naquiya miishaaquiaajuhuaj, taa naquiya na miishaaquiaaricuaani. Naajaa, nojuajaari pa cumanijiaquiaa shuquiriaatia pa quiniuria. <sup>6</sup> Naacuajitij, canaa jaara naquiya miishaaquiaa Cristojiniji canaa pohuatanuucuan, Pueyasoori canaa cumaquiquiaa saaja canaa rejere-tanura. Naacuajitij, majaari canaa tarinitianu Pueyaso Rupaa pohuatanu nia niquiara, seetanujuanaa Pueyaso

pueya nia quiniuria, nia cumanijiasaanurajuhuj. Naa-juhuaj, Pueyaso jaara canaa cumanijiarecuaa, naacuajitij, canaa naata nia cumanijanujuhuj. Canaari nia cumanijiaani, maninia rejeretajaca nia quiniuria naquiya nia miishacari, taa canaa rejeretaquiaacuaani naquiya canaa miishacari. <sup>7</sup> Canaari seetanjuanaa niaacua tiuyani, niaari cumanijiasaanutaniya, maninia rejeretajaca nia quiniuria. Niaari naquiya miiquiaa Pueyaso muerasu nia quiniuucujuhuj, taa canaa miiquiaa naquiyacuaani. Naacuajitij, Pueyasoori nia cumanijanutaniyajuhuj, taa na cumanijiaquiaa canaacuaani.

<sup>8</sup> Canaa panishano Pueyaso pueyanaa, canaari paniyani nia niishiniuria taa canaa tacaquianuni, jiyanohua naquiya canaa miishacari Asia jiyajinia. Canaari puera jiyanohua taraatia miiquianuni. Jiyacari, majaari tari canaa jitianu quiriquiaa cumaaca canaa rejeretanura socua. Canaari jyaniriquiaani maja naasucua tari canaa rishiniu quiniutianiya. <sup>9</sup> Seetanjuanaa, canaari jiyanjiani Pueyaso naasucuaari nareja canaa shanacunutaniya canaa cusunuunura. Naajaa, naacuajitij, Pueyasoori jiyacari canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samiitianijiojua. <sup>10</sup> Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusunuunura. Nojuacuajaari socua canaa cojuanutaniya nocua canaa tiuuniuucua, niaa jaara canaacuara secojorejuhuaj. <sup>11</sup> Naacuajitij, Pueyaso miishacari maninia canaa, queraatia pueya secojonuucua canaacuarajuhuj, queraatia pueyari Pueyaso sequenutaniya, “paacarasho”.

*Pablo pahuatasano casaara na quiaaquiquiaari Corinto pueyacuani*

<sup>12</sup> Canaari shuquiriaatia quiyani canaa niishishacari canaari maninia quijiaca quiquiaari canaa quishacari ni-

aatani, Pueyaso niishiyashijiaca niquiaranio. Majaari canaa sapojonu quijia nijaniya. Canaari seetanujuanaa niaacua taraajejani Pueyaso jiyatenuucua canaa nia pani-jiaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitajatajaaja. <sup>13</sup> Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajinijanaa majaari canaa naajionu quiquiaa jiyajeneta casaa, nia cushitiiniuria. Puetujuanaacuajaari maatia niishishaa-tia quiquiaa nia serojosocoriquiano. <sup>14</sup> Niaacuajaari tari secaja niishiya taa canaa paniya jiyano-hua nijaniyani. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhuj, nijaniyari canaa timitiasano quiniutianiyajuhuj.

<sup>15-16</sup> Cua jiyanihacari niaa naasucuaari seetanujua-naa cua panijiaca, taa cua paniquiaa nijaniyacuaani, janiyari cunora naquerejocanu niaacua juucuaani. Ni-iquiji cua quiasacari Macedonia jiyajiniara, janiyari nia niqiniu paniriquiaa juucua nia tiacajiniani. Jani-yari Pueyaso rupaata nia cumaquiniu paniriquiaa juu-cua cunoco cua tajishacarini. Naacujitij, janiyari ni-ishiriojoriquiaani cua naata naasucua nia shuquiritiniu Pueyaso rupaata, cua quiasacari Macedonia jiyajiniara, naajuhuj, cua tacatesacariuhua cunocojiuhua. Jani-yari niishiriojoriquiaani nia naata naasucua cua naacunu cua panishanotajuhuj, Judea jiyajinia cua quianuhuara. <sup>17</sup> ¿Niaateeri jiyaniquianu janiyari nareya nia sequeca-nuni, naa cua sequesacari coteenujuanaa cua naajiojini-atej? ¿Niaateeri jiyaniya, naa cua naquerejosacaritij, janiyari tama cua panishanojuaaja miiniu paniquianuni, maja Pueyaso panishano? Seetanujuanaa, majaari coojia cua niqijiotenu quiquianu naa cua sequesacari nijaniy-

atej. <sup>18</sup> ¿Janiyateeri coojia niquijjotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocuaajaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacuajaari seetanujuanaa. <sup>19</sup> Naajuhuj, Neyanu Jesucristoori jataashijia. Silvano, Timoteo, janiyajuhuj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. <sup>20</sup> Jesucristocuaajaari tari tohuateequiaari puetunu tariucuacaanu Pueyaso sequesanojuanaa pajaniyara. Naacuajitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritasacari Pueyaso, paari na sequequiaani: “Seetanujuanaari canaa quia sequesano, Pueyasonaa”. <sup>21</sup> Jesucristo rupuejaca pa quishacari, Pueyasocuaajaari pa cumaquiquiaa, socua maninia na tojjijaca canaa quiniuria, nijaniyajuhuj. Pueyasoori pa niquitioquiaari na Sohuanu, seetanujuanaa na muerasu pa quiniuria. <sup>22</sup> Pueyaso Sohuanu pa jiitiasacari poojiajinia, naacuajitij, paari tari Pueyaso sesa jiitiaa juhua naajiotasano poojiajiniani, saa neraja pa quiniuria. Na Sohuanu pa jiitiasacari poojiajinia, paari niishiyani, paari puetunu na sequesanojuanaa maseriquianoni.

<sup>23</sup> Niaari cua jiyaniquianu janiyari najuhuana coojia niquijjotejani, niaacua cua quiaaquiniuucua taa cua sequecanu coteenu nijaniyacujani. Pueyasocuaajaari niishiya, majaari cua quianu quiquianu niaacua Corinto tiacajinia, maja cua tacaatiniuria nijaniya, janiya jaara nia nacasusee jiyanohuani. <sup>24</sup> Canaari maja nia jiyaniijiniani canaa shiniujiuniuria puera nijaniya, Jesuucua nia tiuuniuria. Niaacuajaari tari maninia Jesuucua tiuujia. Canaari saaja niarta Pueyaso pueyani, canaa cumaquiniuria nijaniya, socua pa Jiyaniijia tojjijaca nia quiniuria, seetanujuanaa shuquiriatia quijjaca nia quiniuria.

## 2

<sup>1</sup> Janiyari tama sequecanujuaanijia, maja juhuari ni-aacua cua quianu quiniutianiya, maja cua taraajetenura niajaniya. <sup>2</sup> Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. <sup>3</sup> Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanojua nia taraajetereni, jeecatoojua nia quishacari. Saniniuujia, niaa jaara juhuacarijia jeecare puetunu sesa nia miishanojuanaa, naacuajitij, cua tiuquishacari niaacua, naari cua cojiniutianiya maninia, shuquiriaatia pa quiniuria jatiqui. <sup>4</sup> Janiya jaara niaacuara naajiocanu coteenu cua naajioneeni, janiyari jiyacari jiyanojua tacaariquiaa niaacuani. Cojiaari jiyanojua taraajeriquiaa. Janiyari jiyacari nujuqueriquiaajaaniuhuj. Majaari cua naajionu quiquianu cuno naajionees cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jiyanojua niajaniyani.

*Cuno sesa miijia cuaara jiyanooshaaria jaara tari pishirii sesa na miiniujiniji*

<sup>5</sup> Cuno sesa miijaari maja na taraajetenu quiquianu saa janiyaja. Quera puetunu niajaniyajanaa naasucuaari taraajecanu cuno pueyano miiniuucua sesa. Seetanujuanaa, majaari puetunu niajaniyajanaa taraajenu quiquianu. Janiya jaara sequereni: “Puetunu niajaniyajanaari taraajecanu”, janiya maara puera na maateyani. <sup>6</sup> Puetunu niajaniyajanaa jiyatenuucua nojuaja sanitiosano na quiniuria, nojuajaari tari noojia tacatorohua sesa na miiniujiniji. Tariucujaja. Majaari socua na saniitionu. <sup>7</sup> Quiarijiani nojuaja nia jiyanooriohua.

Nia cumanijiarohua, nojuaja mariqui puera tacaariiri jiyanoehua na taraajesacari. <sup>8</sup> Nocuaji janiyari jiyanoehua nia rootaani, maninia nia miiriohua cuno pueyano, na niishiniuria niaaqui na panijajaa. <sup>9</sup> Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyaniijajiniji cua rootasano tojitiajaca. <sup>10</sup> Cua tojitiare, cana nia jiyanooriicuaani, janiyari na jiyanoyajuhuj. Naacuajitij, pueyano jaara sesa miiriquia, janiyari Cristo niqiuara na jiyanooquiaajuhuj, jatiqui nia quiniuhua. <sup>11</sup> Naaratej, niarta Pueyaso pueya nia jiyanooriqia, Sesaaca mariqui pocua riutiocoreeri, juaajiara na jiyatenura pajaniya, pa jiyanootioyaquiniuucua. Paacua-jaari maninia niishiyani taa Sesaaca niishiriojoquiaa sesa miijiacara na jiyatenura pajaniyani, paa jaara jiyano-ashijia quiriqiani.

*Pablo tacaashacari Troas tiacajinia na quishacari*

<sup>12</sup> Janiya jaara Troas tiacajinia tiuquiquianu Jesujiniji cua pohuatanurani, cuno pueyari jiyanoehua tojitanu paniriquiaa Jesujiniji cua pohuatanura juucua. Jiyacaritij, seetanujuanaa nojori niqiuara pohuataaata quiriqiaari. Pa Jiyaniijia Jesuuri juhua tiotiu riatacanu cucuaji juucua, cua pohuatanura nojuajiniji tii. <sup>13</sup> Janiyari saaja nojori tiujiacanuhuanu puera cua tacaashacari, cua riuriataaquiniuucua pa tarajanu Tito. Janiyari juucua paniriquiaani cua pohuataaanura nijaniyajiniji. Janiyari cunora tacaariquiaa jiyanoehuanu. Naaratej, janiyari Macedonia jiyajinia quiaarohuanu, Tito cua pajenuhuara tii.

*Pa Jiyaniijia Cristoori pa paraa pa shocotaniijia*

<sup>14</sup> Janiyari jiyanoehua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohuataniquiaa canaa.

Naacuajitij, canaa niishishano Jesucristojiniiri juhua shanohua jaanutaja jaanujuquiaa pueya tajinia puetunu tiqiyocuajanaa. <sup>15</sup> Pueyasora, canaari juhua shanohua jaanutajani, Cristo quishacari canaa jiuujiajini. Nojuajiniji canaa pahuatanuusacari, canaari puetunu pueyarajanaa jaanuquiaani: Pueyaso muerasurano, saniitiosaariquiano pueyarano. <sup>16</sup> Saniitiosaariquiano pueyara, Jesucristo rupaari mocuaatia jaanujua saniniuujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriquiano pueyara saniniuujia, Jesucristo rupaari shanohua jaanuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueeteri seetanujuanaa Pueyaso jiyaramiquishanoni, na rupaa nojori pahuatanura, pueya na tiutiniuria Jesucristoocuan? <sup>17</sup> ¿Noo pojoritii, najuhuana Pueyaso rupaa pahuatanuuquiaa, pueyajiniji na masejonura cumaneeca na sapojonuunutatej? Maja. Majaari canaa pahuatanu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pahuatanura. Canaari seetanujuanaa pa Jiyaniijia rupaa pahuataquiaa Pueyaso niquiarani, Cristo rupuesano canaa quishacari.

### 3

#### *Quiarinio rupaa Jesucristojiniji*

<sup>1</sup> Naa canaa naajiosacari niaacuaratej, niaa naasucuaari jiyaniya canaari tama canaa cuaqueyajinijijiaaja nia pahuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pahuatanura coteenu nijaniya, canaacua nia tiuuniuria

cutara? Tamasaca cutaraari naa miiquiaa. Niaacua-jaari canaa niishijiaca cutara. Puetunu tiquiyocuajanaa quijiaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, canaa nia niqutionura nia naajionee, canaa patasocoriquiano, tamasa tiuuniuria canaacua.<sup>2</sup> ¿Naajioneetucua casaara panishaareni? Puetunu pueyajaari na naata niishiniucuaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua nijaniyani.<sup>3</sup> Cristocuaajaari nioojiajinia naajiotaquiaari na rupaa, nojuajiniji canaa pohuatanuucua nia niqiara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajaari niishiya niaari seetanujuanaa Pueyaso pueya, nojuajiniji canaa pohuatanuucua nijaniya.

<sup>4</sup> Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuaajaari naa canaa niishitiquiaa maninia.<sup>5</sup> Majaari canaa niishiriojonu canaa miijosanoori tama canaa cumaacata canaa miishanojuaaja. Maja. Canaari saaja Pueyaso cumaacata poonijioquiaani.<sup>6</sup> Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niqiohua nojori quiniuria. Tariucuaaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja.<sup>7</sup> Naajaa, cuno rootasano saa-



jianeecaacua quejasanoni, cunoori jiyanhua maninia quiquiaari. Naacuajitij, Moisés jaara cuno rootasano niishitiojosaariquiaa Siná tuhuananuucua, Pueyaso shacantuucaari nocua pacuriquiaa. Naacuajitij, na rosacariuhua Israel pueyacua, na jiquiocoori puera shacantuuca quiquiaarijia. Naaratej, narta Israel pueyari maja na naata na jiquioco niqiniu quiquiaari. Na nuhuaji, cuno shacantuucaari jacaria maquesaquiariuhua. <sup>8</sup> Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatasanoocua. Cunoori socua shanhua shacantuuca cutara Moisés jiquiojiniji. <sup>9</sup> Moisés pohuatasano Pueyaso rootasano nojuajani, cunoori seetanujuanaa jiyanhua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojori sesa miijiaa quiquiaari. Saniniuujia, quiarijiaari socua jiyanhua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijiacara nojori jiyatesaanura Pueyasora. <sup>10</sup> Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanhua maninia rupaa canaa pohuatanura Moisés pohuatasanojiniji. <sup>11</sup> Moisés shacantuuca maquesaquiariuhuani, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

<sup>12</sup> Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. <sup>13</sup> Majaari canaa

miiniu taa Moisés miiquiaaricuaani. Nojuajaari quenaaruque toqueta na jiquioco mishiquioquiaari narta Israel pueya niquiyaquiniuria na shacantuuca maquesaano. <sup>14</sup> Israel pueya jiuujiacaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanajuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. <sup>15</sup> Quiarijiaari naajuhuj. Moisés naajioneeca jaara serojosaariquia Israel pueya niqiara, nojori niishitiajaari juhua toqueta mishiquiosano quiyajaa, maja nojori niishiniuria nojori tojishano. <sup>16</sup> Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiajajiniji jaariutiasaaquiaa, maninia na niishiniuria Pueyaso Rupaa. <sup>17</sup> Pa Jiyaniijiaari Pueyaso Sohuanujuhanajaj. Pa Jiyaniijia Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhuj, majaari tari poojia quiniu juhua toqueta mishiquiosano. <sup>18</sup> Naacuajitij, puetunu pajaniyajanaari juhua niquitiu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijia pa quiniuria juhua nojuaja, na Sohuanu poonijosacari poojiajinia.

## 4

<sup>1</sup> Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa pooni-

jiosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria. <sup>2</sup> Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhuj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanana niishiniuria nojoriiri na naata canaacua tiuuniu. <sup>3</sup> Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari. <sup>4</sup> Pueyaso rupaacua tiuyashijiaca nojori quishacari, nojori jiyaniijia Sesaacaari nojori jiuujia jiyatequiaa juhua cariyojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quijia cutara, juhua na Que Pueyasojuhuaj. <sup>5</sup> Canaa pohuatasacari Pueyaso rupaa nijaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. <sup>6</sup> Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari:

“Cuhuashiqui cuaara coretaara ninishiquiji”.

Quiariijaari naajuhuj, nojuajaari poojia cuhuataquiaajujuaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniuucua.

*Paari maninia quijiaca quiniutianiyani saaja Pueyaso ru-paacua pa tiuushacari*

<sup>7</sup> Cuno cumaaca canaa na jiitiaani, cunoori Pueyaso cumaaca cutara. Saniniuujia, canaa cuaqueyari cumaacaaju, saaja juhua maraujiniji panishano pataco. Naacuajiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. <sup>8</sup> Naacuajitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyanoehua canaa tacaashacari, naajaa, majaari canaa tarinitianu quiquiaa Pueyasora poonijionu. <sup>9</sup> Canaari naquiya miishaaquiaajaaniuhuj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuara jaqueroosaaquiaajaaniuhuj. Naajaa, majaari canaa cusojuasaanu quiquiaani. <sup>10</sup> Puetunu tiquiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacuajitij, canaa na niqitiosano cumaaca poonijosacari canaa rishiyashijiaca cuaqueyajinia, pueyari niishiquiaa, Jesuuri seetanujuanaa saminiio. <sup>11</sup> Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacuajitij, saminiio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. <sup>12</sup> Canaari juhua piriuquiuniuquiaani, canaa pohuatanuucua Pueyaso rupaa nia niqiara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

<sup>13</sup> Tariucuacaanu Pueyaso Rupaajinia, supuetana David naajiotasanoori naa sequeya:

“Pueyasooocua cua tiuuniuucua, janiyari pocuareeni”.

Canaari naajuhuj. Pueyasocua canaa tiuuniuucua, canaari na rupaa pohuataquiaani. <sup>14</sup> Canaa jaara puecoosaariquia na rupaa canaa pohuatanuucuan, naajaa. Canacuajaari niishiyani, pa Jiyaniijia Jesu Samiitianiacuajaari canaa samiitianijionutaniuhujuhuj, Neyanu Jesu rupesano canaa quiniuucua. Pueyasoori canaa rijionutaniya puetunu nijaniyatajanaa, pueyaracaanu na shuriucua pa quiniuria. <sup>15</sup> Naacujitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucuan, puetunu cunujuanaari niaacuara, maninia nia quiniuria Pueyasora. Naa Pueyaso jiyanooniucua nijaniyacuaatej, socua queraatia pueyari na timiniutia na sequenutaniya, “paacarasho”. Pueyasoori jyanohua shuquiritiasaanutaniya, queraatia pueya na jiyanooniucua.

<sup>16</sup> Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucajanaa socua mashajashiyacujua. <sup>17</sup> Janiyara, puetunu naquiya canaa miishacarijanaa mijiria, cunoori secaja, rupaquijajuhuj. Cuno naquiya miiniu canaa rejeretanuucua, ¡Pueyasoori cunora jyanohua maninia miiniutaniya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. <sup>18</sup> Naaratej, majaari canaa jiaatianu quiquiaa canaa jitianura mijiria canaa niquishano casa. Canaa cutaraari Pueyaso jiidiasano niquishoo casaacua jiaatiaquiaani. Mijiria niquishano casaari saaja shaajeja casa. Pueyaso jiidiasano pa niquishoo casa saniniunijia, cuno cutaraari shaajeyashijia.

## 5

<sup>1</sup> Mijiria pa quishacarijia, nio pa cuaqueyari saaja

juhua suhuorotu quiya pa sohuanura, nareja juhua ru-coonaa pa quishacari mijiria. Mijiria pa jiitiasano pa shoque jaara cusoquee, paacujaari niishiyani, paari tari jiitiaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiqiora. Cunoori maja pueyano shipinishano. <sup>2</sup> Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucujaji tiasano quiquio. <sup>3</sup> Canaari cuno quiarinio cuaqueya cushiyonutaniya juhua toqueni, maja juhuasu canaa sohuanu quiniuria. <sup>4</sup> Nio cuaqueyajiniija canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacujitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. <sup>5</sup> Pueyasojuanaacujaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujuanaa naa pa miiniutianiya.

<sup>6</sup> Naa canaa niishishacaritij, majaari canaa tacaaniu quiquiaa. Canaacujaari niishiyani nio cuaqueyajinia canaa quishacarijia, majaari juhuanojuaja pa quiniu pa Jiyaniijia shuriucua. Naacujitij, paari tucuacaanu quiyajaani pueyaracaanu pa quijarano quiqiojiniji. <sup>7</sup> Cunora, mijiria canaa quishacarijia, majaari canaa quiniu tama canaa niishitajatajaaja. Canaa cutaraari canaa Jiyaniiji-

aacua canaa tiuuniutia quiquiaani. <sup>8</sup> Naacujitij, canaari shuquiriaatia quiya mijiriani, nocua canaa tiuushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. <sup>9</sup> Naacujitij, canaa jaara nio cuaqueyajinia quiyajaa mijiriani, naajuhuj canaa jaara na cartequeni, canaari saaja pa Jiyaniijia shuquiritini-uucua jiaatiaani. <sup>10</sup> Puetunu pajaniyajanaacuajaari Jesucristo tacoji na nequesoreesaqui nujuatejosaariquianoni. Cuniqi, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaa. Saniniuujia, sesa miijiaaari taraatia miishaanutaniyacujua.

*Pueyasoori pueya jiyanooniu panijia cutara*

<sup>11</sup> Naaratej, canaa niishishacari jiyanohua puereeta quiniutianiya pa Jiyaniijia saniitiosacari na tojitiaashijia, canaari cunora saniniuuiuquiaa pueya tojitiniuria Pueyaso Rupaani. Pueyasocuajaari niishiya canaari seetanujuanaa nera poonijionaani. ¡Seetanujuanaa naa nia niishitiriquijaaniuhuj! <sup>12</sup> Majaari nia jiyaniinu canaari tama canaajiniijiaaja nia pohuatanu coteerohuanuhua, canaacua nia tiuuniuria. Canaari saaja naa nia pohuataani nia niishiniuria casaarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacujiti nia naata cuno pueya tacunu canacuaji, cuno pojori canapute sapuenu juhua maninia quiijiaa niquishano pueya najuhuanacuajani. Majaari nojori niishiniu tacaani taamueca jiuujiaracateja nojorini. <sup>13</sup> Noojiaqueya nia janiyajinijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojuaca quiriqiani,

canaari naa quiya niaarani, maninia canaa niishitiojonura niajaniya. <sup>14</sup> Cristo paniniuucua canaa, cuno na paniniuuri canaa shiniujuquiaa nera canaa poonijionura. Naaratej, canaari pueyaracaanu nojuajiniji pohuataquiaani. Canacuajaari niishiyani, nojuajaari puetunu pueyacularajanaa cusoquiaari. Naa na cusonuucua puetunu pueya nitijianaatej, Pueyasora, puetunu pueyajanaari tari cusonuuquiaari Cristota. Naacuajitij, Pueyasoori na naata jiyanooniu puetunu Neyanuucua tiuuniaajanaa. <sup>15</sup> Cristocujaari puetunu pueyacularajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaariuhujuhuj. Naaratej, paa cuaara miiria saa na panishanojua. Majaari socua pa miiniu tama pa panishanojuaaja. <sup>16</sup> Tarijia, canaari saaja canaa panishano pueyacia taraajejani. Quiarijia saniniuuja, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyanjiani nojuaja naasucuaari nareja pueyano, juhua pajaniyajuhuj. Quiarijia cutara, majaari naa canaa niishiriojonu nojuajiniji. <sup>17</sup> Naajuhuj, cante Cristo rupuesanoni, nojuajaari quiariniora jatanishano pueyano. Tariucuaaanu sesa na quiniuuri tari jatasanocuja. Saniniuuja, puetunujuaanaari quiarinio quiya.

<sup>18</sup> Puetunu cunoujanaari Pueyaso miishano. Nojuajaari Neyanu Cristo cusojuaciaari pocuara, na jiyanooshano pueya pa quiniuria. Na nuhuaji, nojuajaari canaa jiyaramiquiquiaari puetunu pueyajanaa canaa pohuata-nura, nojori jiyanooshaanurajuhuj. <sup>19</sup> Naacuajitij, Pueyasoori mijiria quiniaa jiyanoocua saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na sa-neenu quiniutianihua socua. Nojuajaari canaa jiyatequiaari na rupaa pohuatanaa canaa quiniuria, pueya



canaa tiuutiniuria Neyanu Jesucristoocua, jiyanooshano nojori quiniuriajuhuaj. <sup>20</sup> Naacuajitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasajuanaari nia masuya na muerasu nia quiniuria, Neyanuucua nia tiuushacari. Naacuajitij, canaari Cristo niti nia secojiyani, jtama nia cuaqueyajaaja nia jiyanootiri Pueyasol! <sup>21</sup> Pa Jiyaniijiarano Jesucristoni, nojuajaari tojetaarucujanaa sesa miyashijiajuhanaj. Naajaa, na Que Pueyasoori nocua tiuutiaquiaari puetunu sesa pa miishanojuanaa, pa niti na saniitosocoriquiano. Naacuajitij, Neyanuucua pa tiuushacari, Pueyasoori pa jiyatequiaa juhua sesa miyashijia pa quiniuria.

## 6

<sup>1</sup> Naa Pueyasora poonijionaa canaa quiniuucuatej, canaari jyanohua nia secojiyani cuarta Pueyasol muerasunaa, saa Pueyasoraja nia quiri, nia jyanoojia na quiniuucua. Maninia na muerasu nia quiri. <sup>2</sup> Tariucuaaanu na sequesano cuajaari naa naajiotasano quiya na rupaajinia: “Quiaari namitia cua secojocanu, pueya cua naacunu panishacari. Pueya cua jiyanooshacaricuaa, janiyari quia naacucanujuhuj”.

Cua panishano pueyanaa, quiarijiaari Pueyasol jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

<sup>3</sup> Cunora, canaari tama canaa cuaqueyajaaja cojuaquiaani, maja canaa miiniuria sesa tamasa niquiara. Canaari naa maninia miiquiaani, nojori mariqui Jesucristoocua tiyaquiriiri, nojori mariqui Pueyasora canaa poonijosano sesacarejaariuhuj.

<sup>4</sup> Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujuanaa Pueyasora poonijionaani. Naaratej, canaari juhuajaniya rejeretaquiaa naquiya canaa

miiniuni, canaa panishano canaa jiitiaaquishacarijuhuaj. Naajuhuj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. <sup>5</sup> Naajuhuj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaajaaniuhuaj. Nasojosano pueya jaara miitianu paniquiaa canaani, canaari na rejeretaquiaajuhuj, pueya tiuuniuria canaa pohuatasanooqua. Naa Pueyaso jiyaramiquishano pueya canaa quishacaritij, canaari jiyanohua poonijioquiaa nerani. Canaari sequeyarucua sutequiaani. Canaari miaajequiaajuhuj. <sup>6</sup> Naajuhuj, pueyari na naata niishiniu canaari seetanujuanaa Pueyaso seyani, sesa miyashijiaca canaa quiniuucua, maninia canaa niishiniuucua Pueyaso rupaajuhuj. Niishishaatiacuaajaari, canaari Pueyaso seyani, jacaria pocuajaca canaa quishacari juaajiaca pueyata, naajuhuj, maninia canaa miishacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujuanaa canaa panishacari pueyajuhuj. <sup>7</sup> Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhuj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiyatequiaa canaacuajini. <sup>8</sup> Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari canaa rerequetequiaa saniniuujia. Naajuhuj, noojiaqueya pueyari maninia pohuatanuquiaa tamasaca niqiuara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonuujucatanani. Tamasacaari saniniuujia maninia tojtiaquiaa canaa,

seetanu rupaajanaa canaa pohuatasacari. <sup>9</sup> Noojiaqueya pueyari canaa niquiquiaa juhua najuhuana quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaaquiaani. Naajaa, canaari saminio quiyajaani. Canaari jiyanohua miitiasaaquiaani. Naajaa, majaari canaa puecoosaanu quiquiaani. <sup>10</sup> Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucujuhuj. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiitiaacuajani.

<sup>11</sup> Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishirio-josanojuanaa nia sequereeni. <sup>12</sup> Majaari canaa tarinitianu canaa paniniu jiyanohua nijaniya. Nijaniya sajaraj, majaari nia paniniu canaa, taa canaa paniya nijaniyacuaani. <sup>13</sup> Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanunu! Seetanujuanaa canaa nia paniri, taa canaa paniquiaa nijaniyacuaani, seetanujuanaa panitioojuaca pa quiniuria.

### *Paari Pueyaso quiquioni*

<sup>14</sup> Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhuj, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiaticua shuquiriaatia quiija quiriquia, sesa miijiata na quishacari? Maja. Cua riucureto pueyanaa. ¿Cuhuashiqui quijiateeri na naata juhuajaniya jatiqui quiniu ninishiqui quijiata? Maja na naata. <sup>15</sup> Seetanujuanaa pueyanaa, Cristoori maja Sesaaca

rupuena. Naajuhuj, Pueyasooa tiuujia pueyanoori maja na naata maninia rupuetoonu Pueyasooa tiuyashijia pueyanota. <sup>16</sup> Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tiini? ¡Maja! Paacujaaari pueyaracaanu Quijia Pueyaso quiquioni. Na pueyara na sequesano cuajaaari naa naajiotasano quiya:

“Janiyari nojorijinia quiriquianoni. Janiyari nojori tajinia rucanejonutaniyani. Janiyari nojori Jiyaniijia-janaa quiniutianiyani. Nojoriiri cua pueya quiniutianiyacujua”.

<sup>17</sup> Cunora, pa Jiyaniijiaari na pueya sequeya:

“¡Cua tojtiaashijica pueya tajiniji nia pacure! Nia shiriquiri tamocora nojoriicujaji. Majaari sesa casaa nia saniniu paniniu. Nia jaara cua tojijica quiri, janiyari nia jiyatenutaniya quirianoni. <sup>18</sup> Janiyari nia Que quiniutianiyani. Naacujitij, niaari cua niquiohua quiniutianiya. Naa sequeyanijia, puetunu cumaacaracajanaa cua quiniuucua”.

## 7

<sup>1</sup> Naacujiti canaa panishano pueyanaa, paacujaaari naa seetanujuanaa pa Jiyaniijia sequesano pajaniyarano jitiaani. Naaratej, pueyaracaanu tama pa cuaqueyajaaja juhua jeequesano pa jiitariquia, poojiajuhuj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijica pa quiniuria, saa neraja pa quiniuriajuhuj.

*Corinto pueya tacatosacari nojori jiuujia, maninia nojori quiniuhua*

<sup>2</sup> Pueyanaa, ¿taa nia miiquianuni? ¡Canaa panijica nia quiriohua! Majaari canaa miiniu quiquianu

sesa niajaniya. Majaari quenaaja niquiriyatu nia-janiyajinijinio canaa sesonu quiquianu canaa niishitio-josanota. Majaari canaa sapojonu quijia niajaniya.<sup>3</sup> Naa cua sequesacari niajaniyatej, majaari cua sequenu cua cararonura niajaniya. Janiyacuajaari tari nia se- quereeni, canaari jiyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniuucua niajaniyani, seetanujuanaa Pueyaso muerasu nia quiniuria. Naacuajitij, niaa jaara shaajerejuhuaj, paari pueyaracaanu jatiqui quijiaa quiniutianiya Pueyasotani.<sup>4</sup> Janiyari seetanujuanaa naa nia sequeyani cua panishacari niajaniya. Quiarijiani, janiyari jiyanohua nia timitiaani, maninia cua tojiniuucua niajaniyajiniji. Canaari seetanujuanaa naquiya miiquiaani. Naajaa, maninia canaa tojiniuushacari niajaniyajiniji, cunoori cua cumanijiacanu. Cunora, janiyari jiyanohua nia shuquiritiaani.

<sup>5</sup> Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhuajaniya. Canaari puetunu taraatia miishaacanjuanaani. Pueyasoocua tiuyashijiaacari canaa juaariquiaa. Canaa jiuujiaari niaacua tacaariquiaa saniniuujia.<sup>6</sup> Jiyacaritij, Pueyasoori canaa cumanijiacanu Tito tiuquishacarihua canaacua. ¡Pa Pueyasocuaajaari tacaajiaa cumanijiana!<sup>7</sup> Canaa jiuujia canaa cajitishacarini, cunoori maja saaja canaa niquishacari Tito canaacua tiuquihuano. Canaa cutaraari canaa jiuujia cajitiquianuni, nojuaja jaara canaa pohuatacanu niajaniyajiniji jiyanohua na timiniutia. Nojuajaari canaa pohuatacanu, niaanaari canaa niquiniuucua jiaatiaa. Niaanaari cucua taraajeya, jiyanohua nia taraajetenuucua janiya. Niaanaari cucua tacaya jiyanohua, cua rootasano tojijiaa nia quiniuria quiarijia cutara. Naa cua tojishacari niaacuajitij, janiyari jiyanohua shuquiriquianuni.

<sup>8</sup> Niaacuara cua naajioneeri nia taraajetecanu. Janiyari taraajecanujuhuaaj, naa cua taraajetenuucua nijaniyatej. Quiarijia cutaraari maja cua taraajenu. Cua naajioneecua-jaari saaja rupaquijia nia taraajocanu. <sup>9</sup> Quiarijiani, jshuquiriaatia quiyanijia! Majaari nia jiyaniniu janiyari shuquiriaatia quiyani naa cua taraajonuucua nijaniyatej. Shuquiriaatia quiya cutaranijia, cua niishishacari, naa cua taraajonuucua nijaniyatej, niaari nioojia taca-torohuacuaa Pueyasocua, Pueyaso tojtiajaca nia quini-uhuara. Naacuaajitij, janiyari quiarijia niishiyani, majaqui-iri cua sesonu quiqianu nijaniya, naa cua taraajonuucua nijaniyatej. Pueyasocuaajaquiiri maninia poonijioriquiaa nioojiacajinia, naa nia taraajesacaritij. <sup>10</sup> Pueyasोजनाa jaara pa taraajetere, cunoori maninia, poojia pa taca-tonuhuara nocua, na jiyanooniuria pajaniya. Na nuhuaaji, paari shuquiriaatia quiya cutarani. Saniniuuja, tama pa taraajesacarijiaaja, cunoori tama poojia pa shaajanura-jaaja. <sup>11</sup> Nia taraajesacari cua nacasusacari nijaniya cua naajioneeginiani, cunoori seetanujanaa Pueyaso taraa-jetesano quiqianu nijaniya. Naa nia taraajenuucua-atej, nia niquishuriirij, majaari nia tarishiniu quiqianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiqianu nia juaashacari cuno sesa miiija. Niaari na naaqui puere-canujuhuaaj, niaa mariqui nata cojiritiasaare saniitionu-urii. Niaari cua jaqueroojocanu. Niaari ritia miiqianu cua naajiojinia cua sequesano nijaniya. Naacuaajitij, niaari ritia cuno sesa miiija taanuucanu nia tajiniji, maja socua nia rupuesano na quiniuria. Naa nia miiniuuucua puetunu maninijanaatej, janiyari quiarijia niishiyani, majaqui-iri nia maniniucuanu quiqianu naa sacuaaatia cuno pueyano miishanotej. <sup>12</sup> Pueyanaa, niaari maninia canaa tojijia. Seetanujanaa, cua naajiosacari niaacuara, majaari cua naajionu quiqianu saaja cuno sesa miiija

pueyanojiniji, sesa miishano pueyanojinijinio. Janiya cutaraari niaacuara naajiocanuni tamajaaja nio nia niishinuria Pueyaso niquiara: niaacuajaari seetanujuanaa canaa panijiaca quiyajaa, nia tojishacari canaa. <sup>13</sup> Naaratej, canaari canaa jiuujia cajitiquianuni, canaa tojishacari Tito pohuatasano nijaniyajiniji.

Majaari saaja Tito pohuatasano cumanijianu quiquianu canaa. Canaari Tito timitiicanujuhuaj, canaa niquishacari nojuajaari shuquiriaatia tiuquiriohua canaacua. Puetunu nijaniyajanaari na naacucanu, noojia na cajitiniuhua, najuhuana na tacaaniuucua niaacuajuhua. <sup>14</sup> Tito quiaaquishacarijia niaacua, janiyacujaari juhuacarijia na pohuatacanu nijaniyajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririquiniu quiquianu nijaniyajiniji. Puetunu cua pohuatasanojuanaa Tito nijaniyajinijiiri seetanujuanaa quiquianu Titora. Naajuhua, puetunu cua pohuatasano nijaniyajanaari pueyaracaanu seetanu rupajanaa quijia. <sup>15</sup> Quiarijia Tito niishiriojosacari nijaniya, nojuajaari socua jiyanhua nia panijia quiya, nia tojinuuucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. <sup>16</sup> Janiyajuhua, jiyanhua shuquiriaatia quiyanijia, cua niishishacari quiarijia cutara cua naata niaacua tiuuniu seetanujuanaa.

## 8

### *Capora pa quiriqiaj*

<sup>1</sup> Quiarijiani pueyanaa, canaari nia pohuatanu paniyani, taa Pueyaso cumaquiya jiyanhua na muerasu maapue niya Macedonia jiyajiniani. <sup>2</sup> Nojoriiri jiyanhua taraatia miiquioquiaa. Naajaa, nojoriiri saaja jiyanhua

shuquiriaatia quiya. Naajuhuj, casamiijiuniucua nojori quishacari, naajaa, nojoriiri caporaturjuri. Nojoriiri na cumaneecajiniji nareja niqutiojoquiaa queraatia, Judea jiyajinia casamiijiuniucua Pueyaso pueyara. Nojori niqutiojosanoori juhua casamiriaca pueya niqutiojosano. <sup>3</sup> Seetanujuanaa narta Pueyaso pueyacu nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jiiiasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano niajaniya. Janiyacuajaari nojori miishano niqiniyani. <sup>4</sup> Niya Macedonia jiyajinia quiniaa parta Pueyaso pueyani, nojoriiri niajanijajiniji tojiquianu. Niaanaari cumaneeca reratenu paniriqiaacuaa, nia jiyarosocoriquiano Judea jiyajinia quiniaa casamiijiuniucua parta Pueyaso pueyara. Naaratej, nojoriiri jiyanohua canaa nenecojocanu canaa masenura nojori niqutionu panishano cumaneecajuhuj, parta Pueyaso muerasura. <sup>5</sup> Seetanujuanaa Pueyaso tojijiaca nojori quiniucua, nojoriiri maja saaja na cumaneeca na niqutiojonu quiqianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijjara, taa Pueyaso paniya pa miiniuriacuajani. Naajuhuj, nojoriiri tama na cuaqueyajaaja jiyatecanu canaa tojijiaca nojori quiniurijuhuj. Cunora, canaari nojoriicuaji jiuujiatecanuni. <sup>6</sup> Naa capora niqutiojonaa nojori quiniuucuatej, canaari Tito sequerucuaani, niaacua na quianuhuaa quiarjia. Nojuacuajaari tarijia naacucanu niajaniya, nia reratenura nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatnura reratenu puetunu nia niqutionu panishano cumaneecajanaa. <sup>7</sup> Niajaniya,



Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasoocua tiuujiaa jiyanoehua. Naajuhuaaj, niaari jiyanoehua maninia Pueyaso rupaa niishitiojonuujuaca. Niaari Pueyaso niishitiaja jiiitaajuhuaaj. Niaari mariyata shitimia poonijionuujuaca, tamasa nia naacunura. Naajuhuaaj, niaari canaa panijiaa jiyanoehua. Naatej, taa maninia miijiacatucua niajaniani, capora nia quirijuhuaaj, nia cumaneeca nia niqutiojonura nareja parta Pueyaso pueyara.

<sup>8</sup> Majaari juhua nia jiyaniiija cua sequenu niajaniana, nia cumaneeca cua niqutiojotenura niajaniana. Janiyari nareja nia pohuatariquiaa capora Macedonia pueyajinijini, tama nia niishiniurijaaja, niaate seetanujuaanaa canaa panijiacajuhuaaj, taa Macedonia jiyajinijinio pueya paniya canaacuaani. <sup>9</sup> Niaacuajaari pa Jiyaniiija Jesucristojiniji niishiya; na Que Pueyaso shuriucua na quishacarija, nojuajaari puetunu maninia casaajanaa jiiitiaja quiquiaari. Naajaa, nojuajaari juhua casamiijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniuujia jiyanoehua shuquiriaatia quijiaa na jiyatenura pajaniya, juhua jiyanoehua queraatia casamiriaca pueya pa quiniuria. Níaa jaara seetanujuaanaa panijiaa quiriqia, naa nia miirijuhuaaj, taa pa Jiyaniiija miiquiaaricuaani.

<sup>10</sup> Janiyari niishiriojoriquiaani, taate socua maninia nia naata miiniu parta casamiijiuniucua Pueyaso pueyarani, shuquiriaatia nia quiniurijuhuaaj. Cua tojiri. Niaacuajaari niishiya, noo marijara pa shococanutej, niaacuajaari juhuacatecara cumaneeca reratejonu coteceanu. Niaari naa maninia miiquianu tama nia tacaashacarijaaja niarta Pueyaso pueyacu. <sup>11</sup> Niaari shitimia juhuacatecara nia cumaneeca niqutiojonu coteceanucua. Naaratej, quiaritia nia sequeyanijia, niaa cuara naa shitimia niqutiojonu tucuaara puetunu nia niqutionu panishano

cumanecajanaa. Nia jiitiasano cumaneecajiniji nia niq-  
uitiojore, taa cumaneeca nia niqutionu paniyacuajani.

<sup>12</sup> Nia tojiri. Paa jaara seetanjuuanaa nareja niqutionu  
paniriquia pa cumaneecajinijini, Pueyasoori pa niq-  
tiosano shuquiritiaja, paa jaara juhua capora niqutiore  
pa jiitiasanojinijini. Maja cutaraari Pueyaso paniniu pa  
niqutionura, pa jaara na jiitiaaquiyani.

<sup>13</sup> Majaari Pueyaso paniniu cutara puera nia niqutio-  
jonura nia cumaneeca, tamasa quiniuria casamiriaca,  
saniniuujia nia jiitiaaquiniuria nia panishano. <sup>14</sup> Maninia  
cutaraari puetunu Pueyaso muerasujuanaa jiitianura na  
panishano. Naaratej, quarijiani, niaa cuaara niqutio-  
jooora nia jiitiasanojiniji, nojori jiitianura na panishano-  
juhuaj. Tamacari saniniuujia, nojoriiri saniniuujia nia  
jiitiaaquishoo casaa nia niqutionutaniyacujua, niaa jaara  
na jiitiaaquiri. Naacuajitij, puetunu Pueyaso muerasujua-  
naari na panishano jiitianutaniya mariyata, maja rimia-  
jata. <sup>15</sup> Naajuhuj, tariucuacaanu Pueyaso Rupaajiniani,  
jiyocuacaanuji Pueyaso tinishano Israel pueya miaqueso-  
coriquiano panjinijiiri naa naajiotasano quia:

“Cante queraatia reratequiaarini, majaari quenaaja na  
cureenu quiqiaari. Naajuhuj, cante secaja  
reratequiaarini, majaari nojoriria na pueetanu  
quiqiaari”.

Naaratej, Pueyasocua tiuujia nia quiri. Nia jiitiasano-  
jiniji nia niqutiojore nareja, nia jamueyaquiniutia.

*Pablo pahuatasano Titojiniji, Tito cojiniaajinijini*

<sup>16</sup> Titoori jiyanohua niaacua jiaatiaja, taa cua jiaatiaa  
niaacuacuaani. Pueyasocuaajaari na jiyatequiaari nia pani-  
jia na quiniuria. Janiyari cunora Pueyaso sequequiaani:  
“¡Paacarasho Pueyasonaa!” <sup>17</sup> Naacuajitij, janiya jaara  
Tito sequerucuaani nia niquniuucua na quianura, nojua-  
jaari cua timitiriucuaa. Tama nojuajaari nia niquniu-  
cua jiaatiaa. Naacuajitij, nojuajaari quarijia quianutaniya  
niaacua.

<sup>18</sup> Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritasano pueyano, maninia na pohuatanuucua pa Jiyaniijia Jesucristojiniji.

<sup>19</sup> Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuaqaqiiri nojoriicua taraajecajuhuj.

<sup>20</sup> Maniacuajaari parta Pueyaso pueya maapue saquiriojosano pueyano quianura canaata. Naacujitij, majaari pueya jiyaniinu quiniutianiya canaari nio queraatia canaa reratesocoriquiano cumaneecajiniji nohuasenutaniyani. <sup>21</sup> Canaari pueyaracaanu maninia miiniu paniquiaani puetunu pueya niquiarajanaa, maja saaja Pueyaso niquiarara.

<sup>22</sup> Quiarijiani, niaacua canaa jiyarosocoriquiano puey-ata, canaari niquijinio tamonu parta Pueyaso pueyano jiyaronutaniyani. Pueyaracaanu na poonijosacari pa Jiyaniijia, janiyajanaari na niqiquianuni. Nojuajaari seetanujuanaa pueya panijia, Pueyaso panijia na quini-uucua. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. <sup>23</sup> Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naa-juhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maninuhuaqueetasano, maninia na tojitiajaca nojori quiniuucua. <sup>24</sup> Naaratej, nio pojori jaara niaacua tiuquijioosee, niocua puetunujuanaa maninia miiri nojoriria, nia paniniutia nojori. Naacujitij, puetunu Pueyaso muerasu maapuejanaari niishiniutianiya niaaqui seetanujuanaa

panijiaca. Naajuhuaaj, puetunu Pueyaso pueyajanaari ni-  
ishiniutianiya, majaari cua sapojonu quiquianu, maninia  
cua pohuatasacari nojori nijaniyajiniji.

## 9

*Pablo shiniujiushacari pueya, cumaneeca nojori reratenura  
narta Pueyaso pueyara*

<sup>1</sup> Janiyaruhua najuhuaana niaacuara naajiyani, cua se-  
quenura nijaniya, nia cumaneecata nia naacunura Judea  
jiyajinia quiniaa parta Pueyaso pueya. <sup>2</sup> Janiyacuajaari  
niishiyani, niaari tarijia na naacunu paniquianucuaaja.  
Cua shuquiritiasacari cunora nijaniya, janiyari pueyara-  
caanu niya Macedonia jiyajinia quiniaa parta Pueyaso  
pueya niqiara pohuataquiaa nijaniyajinijini. Janiy-  
acuajaari nojori pohuataquiaani, nijaniya Acaya jiya-  
jinia quiniaa pueyani, niaari nia cumaneeca niqutionu  
paniquianu noo marijara pa shococanutej. Naaratej,  
queraatia niya Macedonia jiyajinia quiniaa Pueyaso  
pueyari cunora jaarajaaja na cumaneeca niqutionu  
paniyajuhuaaj, naa nojori cua pohuatanuucua nijaniya-  
jinijitij. <sup>3</sup> Janiyari niaacua tiuya seetanjuuanaani, ni-  
aacuajaari canaacuaji tariucua reratesano jiitianutaniya  
nia cumaneeca, taa cua pohuataquiaa niya nijaniya-  
jinijicuaajani. Naajaa, janiyari nio parta Pueyaso pueya  
jiyaronutaniya niaacuani, seetanjuuanaa juhuacarjia nia  
reratenura nia niqutiojosocoriquiano cumaneeca. Ma-  
jaari cua paniniu cutara cua pohuatasano nijaniyajiniji  
cuaracashitishaanura. <sup>4</sup> Macedonia jiyajinijinio parta  
Pueyaso pueya naasucuaari cuata tiuquiniutianiya ni-  
aacua. Nojori jaara cuata tiuquishii niaacua, canaa jaara  
nia riuriatasee nia cumaneeca rerateyojuani, canaari  
caririquiniutianiyan. Niaari caririquiniutianiyajuhuaaj.

<sup>5</sup> Naaratej, janiyari Tito sequereeni, parta Pueyaso muera-suta na quianura coteenu niaacua cucuaji, nia niqutiojonu panishano cumaneeca cuaara tari reratesano quiiria canaacuaji. Naacuajitij, nia niqutiojosano cumaneecaari seetanujuanaa nareja nia niqutionu panishano quiniutianiya, maja canaa niqutiojotesano nijaniya.

<sup>6</sup> Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniya-jaariuhuj. Saniniuujia, cante queraatia natajani, queraatia senoonutaniya-jaariuhuj”. Naajuhuj, paa jaara capora quiriquiani, Pueyasoori saniniuujia socua queraatia pa niqutionutaniya pa niqutiosanojiniji. <sup>7</sup> Naaratej, puetunu nijaniyajanaa cuaara niqutioora taa nioojia-jinia nia niishiriojoree nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutano. Naajuhuj, majaari nia niqutionu nia cumaneeca saaja tamasaca shiniujiushacari nijaniya. Pueyaso cutaraari shuquiriaatia niqutiojuaca timitiaja. <sup>8</sup> Pueyasocujaari cumaacaraca na niqutionura nijaniya puetunu nia panishanojuanaa nia jiiti-asocoriquiano pueyaracaanu. Naacuajitij, niaari pueyaracaanu socua queraatia jiitiajaca quiniutianiya, tamasaca nia niqutiojonurajuhuj, nojori jaara jiitiaquiriquia nojori panishano. <sup>9</sup> Niaa jaara naa capora quiriquiatej, niaari nio tariucuaaanu Pueyaso Rupaa naajiotasano tohua-teenutaniya. Naa sequeyari:

“Maninia pueyanoori juhua capora nareja niqutiojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyasora. Majaari Pueyaso niyajetanu quiniutianiya”.

<sup>10</sup> Pueyano natasacari casaa jajau na cuhuariquiajinia, Pueyasoori na canijiaquiaa. Naacuajitij, na camaruuri socua jiitianutaniya tamacari na natasocoriquianohua, na miaquesocoriquianonio. Naajuhuj, juhua capora

nia niqutiojosacari nia jiitiasanojiniji, niari juhua nia cuhuariquiajania nataa. Naacuajitij, Pueyasoori nia jiyatenutaniya socua queraatia jiitiajaca nia quiniuria, pueyaracaanu maninia nia miiniuria tamasarajuhuj. <sup>11</sup> Naa capora nia quiniuucua nia casaatatej, Pueyasoori juhua capora nia niqutiojonutaniya puetunu na jiitiasanojinijijiana, queraatia nia jiitianura, tamasaca nia niqutiojonura pueyaracaanu. Naacuajitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojoriiri Pueyaso sequenutaniya, “paacarasho”. <sup>12</sup> Naacuajitij, nojori jaara masere nojoririano nia jiyarosano cumaneeca, majaari saaja nojori jiitanu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”. <sup>13</sup> Nojori jiitiasacari puetunu nojori panishanojuanaa, nojoriiri Pueyaso maniniuuaqueetanutaniya jiyanojua. Nojoriiri naa maniniuuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiajacajuhuj, naajaa, taucuaca nia quishacari nojoriria. Nojoriiri Pueyaso maniniuuaqueetanutaniyajuhuj jiyanojua capora nia quiniuucua nojoriria, tamasaranio. <sup>14</sup> Nojoriiri Pueyaso seconutaniya niaacuarajuhuj, jiyanojua nojori paniniutia niajaniya, Pueyaso jiyatenuucua niajaniya nojori paniijaca nia quiniuria. <sup>15</sup> Naajuhuj, janiyari jiyanojua Pueyaso sequeyani, “paacarasho”, jiyanojua maninia na miiniuucua niajaniya, Neyanu Jesucristo jataniniuucua nioojia.

## 10

*Pablo cuaara tojishaaria, Jesucristo jiyatenuucua nojuaja na rupaa pohuatanara*

<sup>1</sup> Janiyacuajaari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhuj. Janiyari naa quiniu paniyajuhuj. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuaquiaa, janiyanaari jacaria pocuaja quiquiaa juhua puerejani, nia tajinia cua quishacari. Saniniuujia, tucuacaanu cua quishacari, janiyanaari jiyanohua nia nacasuquiaa cua naajioneeginiani, juhua nia pueresano jiyaniijia.

<sup>2</sup> ¿Seetanutejanaa, janiyate naani? Janiya jaara naa quiya niaarani, naajaa. Quiarijia tucuacaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyanohuani, sacuaraatia cucuara rimiaaquenuuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niqiara.

<sup>3</sup> Seetanujuanaacuaaquiniatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetojoquiaacuani.

<sup>4</sup> Mijiria quiniaa pueyari miaquetojoquiaa cutara tama nojori shipinishano casaatajaaja. Canaa miaquetojotaja saniniuujia, cunoori Pueyaso cumaacajanaa cutara. Naacuajitij, canaa naata Sesaaca niishishano shocotanu.

<sup>5</sup> Pueyaso cumaacata, canaari mijiria niishijica niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhua pueya niishirijosano jataniquiaani, Cristo tojijiaca nojori quiniuriajuhuaj.

<sup>6</sup> Canacuajaari Pueyaso jeenucuasano pueyani, canaa nacasunura puetunu tojiyashijiacajanaa. Naacuajitij, niaa jaara puetunu Pueyasojiniji canaa niishitijosanojuanaa

tojitiajacara quiriohua, na nuhuaji cutara canaa naata puetunu cureeno tojiyashijiacajanaa saniitionu.

<sup>7</sup> Niaari tama cushitiiquiaajaacujua nia tiuushacari cuno sapojonuujuaa pohuatasanoocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, najaniya cante sapojosaacanucujani. Naa jaara niishiri niaari seetanujuanaa Cristo saquiriojosano pueya, naacujitij, najaniya cuaara niishiiria canaari Cristo saquiriojosano pueyajaniuhuj. <sup>8</sup> Naa jaara jiyaniya janiyari juhua pueya shocotaja nia sequeyani: “Canaari nia jitianaaani”, naajaa, majaari cua caririquiniu naa cua sequesacari najaniyatej. Pa Jiyaniijia Cristojuaanaacua jaari canaa jiyatequiaari nia jitianaa canaa quiniuria. Canaari naa jiyatesaaquiaarini, canaa cumaquiniuria najaniya na rupaata, seetanujuanaa Cristo pueya nia quiniuria. Majaari canaa jitianu najuhuaana na cumaaca, canaa sesonura najaniya. <sup>9</sup> Naa cua naajiosacari naaacuaratej, majaari nia jiyaniniu janiyari nia piriyojiyani nia puerenura janiya. <sup>10</sup> Tamasaca najaniyajini jinio pueyanaari cua sequequiaajuhuj: “Pabloori puera jiyanohua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhuj, na pohuatasacari pa niquiara, na pohuatasanoori maja shanohua tojishano”. <sup>11</sup> ¿Seetanutejanaa? Cante naa pocuaquiaani, nojuaja cuaara niishiiria quiarijia, taa canaa naajiocanu naaacuaracujaja tucuaaanu canaa quishacarijiani, canaari naa miinitianiyani niaacua canaa tiuquishacari.

<sup>12</sup> Cuniqini niaata quiyajaariuhua tamasa pueya, canapete nia sequequiaacujani, nojoriniaari socua maninia Pueyaso rupaa pohuatanaa tamasaajiniji, canaajinijijihuj. ¿Nojoritiiri seetanujuanaa socua maninia Pueyaso rupaa pohuatanaa canaajiniji? Johuj. Naajaa. Majaari



canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuatanaa. Nojoriiri naa quijiacatej, nojori jiyaniishacari nojori cutaraari socua tojishano pueya tamasacajiniji. Naa nojori miishacariitij, nojori cutaraari seetanujuanaa mosanucua. <sup>13</sup> Canaa cutara, majaari tamasaca poonijiosano canaa jiyatenu quiquiaa juhua canaa poonijiosano Pueyasora. Canaa cutaraari saaja canaa miishano shuquiritiaquiaani, tee Pueyaso jiyaroquiaari canaacuajani. Nojuacuajaari canaa jiyaramiquiiaari niaacua Corinto tiacajinia, nia niquiara canaa pohuatanura na rupaa. Naacuajitij, niaari na muerasura quiquiaari. <sup>14</sup> Majaari najuhuana canaa timitianu nijaniya, Pueyaso muerasu nia quiniucua. Niaacuajaari Pueyaso muerasura quiquiaari canaa pohuatanuucua nia niquiara seetanu rupaajanaa Jesucristojiniji. Canaa cutaraari seetanujuanaa Pueyaso rupaa pohuatanu coteetanaa nia niquiarani. <sup>15</sup> Majaari canaa shuquiritianu najuhuana nijaniya. Canaa cutaraari nia tiuutiquiaari Jesucristoocuaani, niaacua Pueyaso jiyaronuucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiujiaca nia quiniuria. Naacuajitij, niaa jaara seetanujanaa Pueyaso rupaa tojijiaca quiri, niaari saniniuuji na naata canaa cumaquiniu. <sup>16</sup> Niocua canaa cumaquiri canaa quianura tamaqui, tee Jesucristojiniji pohuatasoojua quiyacuajani, tii canaa pohuatanura nojuajiniji juhuaj. Majaari canaa quiniu paniniu pootia tamasaca poonijiosaqui, taa cuno rimiaacoori quiquioya shuquiriatia canaa poonijiosaquicuaani. ¿Nojori shuquiritasanteeri tama nojori poonijiosanojuaaja? Maja. Niaacuajaari Pueyaso muerasura quiquiaari canaa nia tojitianuucua.

<sup>17</sup> Pueyanaa, nio tariucuaaanu naajiotasanoori niaara, nia niishishocoriquiano. Naa sequeyari: “Cante shuquiri-

aatia quijia quiniu paniyani, nojuaja cuaara pa Jiyaniijia shuquiritiaara cutara”.<sup>18</sup> ¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

## 11

### *Pablo pohuatasano na paraajiniji*

<sup>1</sup>Pueyanaa, cua tojitiuri nareja. Juhua paateca tama cua cuaqueyajiniijiaaja nia pohuatanu paniyanijia. Naajaa, quenaaja nia rejeretare janiya. <sup>2</sup>Janiyari jiyanohua nia tacaatiaquiaani, saaja Jesucristora nia quiniuria. Niaacuaajaari niishiya, naatej, taa pueyano cojuaacuaa neyatunijojua canuucujini, saaja na camiriquiano pueyanora na quiniuria, naajuhuj, janiyari nia cojuanu paniyani sesosoo nia quiniuria nia Jiyaniijiaara. Cristocuaajaari juhua nia niyacarano. Nia jiitiana cua quishacari, janiyari juhua nia queni. <sup>3</sup>Tarijia, niaacuaajaari saaja Cristo tojitiajaca quiquiaari, na panijia nia quishacari. Quiarijia sanini-uujia, janiyari Sesaaca nia pueretaani, nojuaja mariqui nia sapojoreeri Cristoocujini nia rupatenura, taa cuno Susanacu sapojoquiaari Eva tariucuaaanucuaani. <sup>4</sup>Cuno sapojonuujuaca tiuquijiosacari niaacua, tamaatia nojori pohuatanura Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji niajaniya. Nojori nia tojishacari, niaari juhuajaniya samaruhua niishishano

tojitiaquiaajuhuj. Niaacuajaari tari tiuuquiaari Jesu-cristoocua, Pueyaso jiyanooniuria nijaniya. Saniniu-ujia, cuno pojori pohuatasacari tamaatia, taa nia miiniutianiya Pueyaso pueya nia quiniuriani, niaari jaara-jaaja ritia nojori tojiquiaajuhuj. <sup>5</sup> ¿Cuno sapojonuu-juacateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquis-hano pueyarani? ¡Janiyara maja! <sup>6</sup> Seetanujuanaa, ma-jaari cua niishiniu maninuhuaqueenu cua pohuatasacari Pueyaso rupaa, taa cuno pojoricuaani. Naajaa, Pueya-sojiniji cua niishishano cutaraari seetanu rupaaanaa, tojishocoriquiano cutara. Maja najuhuanaj. Niaacua-jaari cuno niishiya, pueyaracaanu saaja maninia cua mi-ishacari nia niquiara, cua pohuatasanojininino.

<sup>7</sup> ¿Casaara nia tojitiaa cuno pojori quiarijianijia, ma-jaari saniniuujia nia tojitianu janiya? ¿Janiyateeri sesa miiquianu nijaniyani, cua masejoyaquiniucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaari tama cua cuaqueyajaaja mueyashitiquiaarini cua cumaquiniuria nijaniya. Naa cua miiniuucuatej, ¿cunoteeri sesa niaara? <sup>8</sup> Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quia-nura niaacua, nia niquiara cua pohuatanura Pueyaso Rupaa. <sup>9</sup> Saniniuujia, nia tajinia cua quishacari, cua jiitiaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua ji-itiaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niqutioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura nia-janiya cua panishano cua jiitiaaquishacari. Janiyari naa miiniutianiya pueyaracaanuni. <sup>10</sup> Cua Jiyaniijia Cristocua-

jaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacujitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. <sup>11</sup> Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesaciritij, ¿janiyateeri nia paniyaquiyani? ¡Maja! Pueyasocuaajaari niishiya, janiyari jiyanojua nia panijiani.

<sup>12</sup> Nia sequereera casaara cua mashiniquijiyaquiquiaa nia cumaneecani, cua pohuatasacari Pueyaso rupaa nia niqiara. Cuno pojori, nia jiyaniishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuj, taa canaacuaani. Saniniuujia, nojori mashiniquijiosacari nia cumaneeca, nojori nia niqutiojonura nareja, naacujiti maatia niishishiyari, ¿nojoriiri jiyanojua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa niajaniya. <sup>13</sup> Seetanujuanaari, ¿nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya nojori quiniuria. Naacujitij, nojoriiri nia sapojiya. Nojoriiri sapuenu juhua Cristo jiyaramiquishano pueya niqishano najuhuanaj. <sup>14</sup> Cunoori maja jiyajeneta naa nojori miiniuriatej. Satanáscuaajaari tama na cuaqueyajaaja jatanijia shacantuucara, juhua Pueyaso seru na niqishaanura, pueya na sapojonura. <sup>15</sup> Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuanaa maninia miijiaca pueya nojori quiniuria. Nojoriiri naa miiquiaa, Satanás seya nojori

quiniuucua. Naajaa, nojoriiri saniitiosaanutaniya sesa nojori miiniuucua!

*Pablo pahuatasacari naquiya na miiniujiniji, Cristo jiyaramiquishano na quiniuucua*

<sup>16</sup> Socua nia sequenu pacuteyanijia, majaari nia jiyaniniu janiyari paatecani cua pahuatasacari tama janiyajinijiaaja. Naa jaara jiyaniya janiyari seetanujuanaa paatecani, naajaa, rupaquijia cua tojitiare quenaaja. Janiyari juhua paateca tama janiyajinijiaaja niaara pahuatanu panijajaanihuaj, taa nia tojishano pueya miiquiaacuaani. <sup>17</sup> Naa cua pahuatasacari tama janiyajinijiaajatej, cunoori maja cua Jiyaniijia Cristo pahuatesano janiya. Cunoori tama cua pahuatasanojuaaja, juhua paateca cua quishacari. <sup>18</sup> Naatej, taa queraatia Pueyaso rupaa pahuatanaa tama nojorijinijiaaja pahuatanuuquiaacuaani, janiyari quiarijia naa tama janiyajinijiaaja pahuatanu panijajuhuaaj. <sup>19</sup> Jiyanojua niishijia nia quishacari, niaari cuno paatecoori tojitiaquiaa juhuajaniya. Naatej, taa nia tojitiaquiaa cuno pojoricuaani, quiarijia cua tojitiarejuhuaaj. <sup>20</sup> Naajuhuaaj, niaanaari juhuajaniya rejeretaquiaa cuno nojori, nojori jaara nia poonijotequiaa juhua nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoriicua shiiniuquiuquiaa saaja, naajaa, nojori soosacari nijaniya. Niaanaari juhuajaniya nojori rejeretaquiaajuhuaaj, nojori jaara nia jiquioco maseteriquia. <sup>21</sup> ¡Nojoriqiiiri jiyaniijianucuaajanaa cutara! Saniniuujia, janiyari nojori naaqui caririquiyani juhua nojori cua quiyaquiniuucua, maja naa canaa miiniuucua nijaniya, taa nojori miiquiaa sesa nijaniyacuaani.

Naajaa, quiarijia cutara, janiyari tama janiyajinijiaaja pahuatanutaniyani, taa nojori pahuataquiaa juhua

paateca tama nojorijiniijiaajacuaani. <sup>22</sup> ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacajuhuaaj? Janiyajuhuaaj. Janiyari Hebreo pueyanojuhuaaj, Hebreo rupaa pocuajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari Israel pueyacuajinio supuenojuhuaaj. ¿Abrahamtenaari nojori supuetana? Abrahamcuajaari cua supuetanajuhuaaj. <sup>23</sup> ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanoehua soyani, juhua paateca naa cua pohuatasacari tama janiyajiniijiaajatej. Naajaa, janiyari seetanujuanaa nia sequeyani. Janiya cutaraari socua jiyanoehua nojorijiniiji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniiji cua pohuatanuucua. Naajuhuaaj, janiyari pueyaracaanu caminiujiushaaquiaari majacununi. Naajuhuaaj, janiyari pueyaracaanu cocuaatia miiquiaarini, pueya monu panishacari janiya. <sup>24</sup> Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari carteja na majacusano pueyano. <sup>25</sup> Naajuhuaaj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniniacu caminiajinia cua jaaretasacari buquejia, jiuujianaraca buqueeri tiuquitiaquiaari. Naa tamacari buque tiuquitasacarijuhuaaj, janiyari na raucua cutaquiaarini puetunu niucujajanaa, niquiriyatu juucanio. Cunoori quiquiaari puereeta shoniniacu caminia jiuujiajia. <sup>26</sup> Janiyari pueyaracaanu tiquiyocua rucuanerajoua quiquiaarini. Naacuajitij, moocua cua niuuniujiushacari, janiyari cocuaatia miiquiaarini. Naa cua

rucuanesacari, janiyari pueyaracaanu puereeta nohuasenuujuaca quishaqui shocoquiaarini. Naajuhuj, tama cuarta Judiocuacajaaritia pueyaracaanu cua mitianu panijia, taucuanio. Puereetaari quiquiaarijihua cua rucuanesacari tiacajinia, tiqiyocua pueya quiyaquishaqui, shoniniacu caminiajiniano. Naajuhuj, puereetaari quiquiaari janiyara, cua jyanishacari janiyari cuarta Pueyaso muerasu tajinia quiyani, saaja cua paraa nojori quishacari. <sup>27</sup> Jyanohua cua poonijosacari cua Jyanijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijihuj. Janiyari noojiaqueya miaqueyaquiquiaarijihuj, jeya cua quiyaquishacari. Janiyari naquiya miiquiaari cua rucuanesacari shiniquiajiniajuhuj, toqueju cua quishacarijuhuj.

<sup>28</sup> Janiyari naa naquiya miishaquiaarini, mariyata tamaatia naquiya miiniujihuj. Naajuhuj, janiyari puetunu juucajanaa niishiriojoquiaani, taariquitijia Pueyaso muerasu maapue quiya puetunu jiyacajiniajanaatej. Janiyari jyanohua nojoriicua tacaquiaani. <sup>29</sup> Naacuajitij, tamonu cuarta Pueyaso pueyano jaara rejeretaaquiriquia Sesaaca saniniujishacari nojuaja, janiyari jyanohua taraajeja nocuani. Tamonu jaara sesa miitishaare, janiyari na naaqui caririquiyajuhuj. <sup>30</sup> Niaa jaara paniya socua cua pohuatanura njaniya tama janiyajinijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. <sup>31</sup> Pa Jyanijia Que Pueyasocujaari niishiya janiyari seetanujanaa sequeyani. Nojuajanaa cuara pueyaracaanu maniniuhuaqueetasaaria cutara, maja nojuajiniji pohuataana. <sup>32</sup> Tarijia, Damasco tiacajinia cua quishacari, tamonu pueyanoori Damasco tiaca jyanijia quiriqiaa. Nojuajaari cuno jiya jyanijia

Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadohua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohuatanuucua.<sup>33</sup> Naajaa, cuarta Pueyaso pueyari namitia cua roshinitiaquiaari shuquiriaatia, puereetuuca canaasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacuajini.

## 12

### *Pablo pohuatasano Pueyaso niqutishanojiniji nojuaja*

<sup>1</sup> Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niqutishaaquiaari pa Jiyaniijia casaa jiyocuacaanuni.

<sup>2</sup> Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojiniarani. Naa cua tacanishaanujinijitij, tari shocojorucuaari catorce marijia. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuaj.

Saaja Pueyasocuajaari na niishiya. <sup>3</sup> Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuajaari na niishiya.

<sup>4</sup> Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuatasaanu mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quiniaa pueyara.

<sup>5</sup> Naa Pueyaso niqutiniuucua janiyatej, janiya maara



tama janiyajiniijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. <sup>6</sup> Naajuhuj, janiya jaara tama janiyajiniijiaaja pahuatanu paniriquiani, cuno maara seetanujuanaa pahuatasano quiriquia, maja juhua paateca pahuatasano. Seetanujuanaa majaari naa cua pahuatanu paniniu, pueya mariqui cua pahuatasanojiniji cua jiyaniriiri janiya jiyanohua maninia pueyanoni. Pueya cuaara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numaatajaaja nojori tojishacari cua niishitiojosanojuhuaj. <sup>7</sup> Pueyaso niquitishano janiyani, na niishitishano janiyajuhuj, cunoori puera jiyanohua maninia quiquiaari. ¡Cunoori jiyanohua cua timitiquiaari! Naaratej, janiyari cua cuaqueyajinia nootusaaquiaari juhua jiuhuacatani, janiya mariqui pueya shocotajara quiriiri. Cuno taajeta noonuuri Satanás miishano quiquiaari, na tacaatiniuria janiya. <sup>8</sup> Janiyari jiyanohua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pacutejoquiaari secojonuni. <sup>9</sup> Cua Jiyaniijiaari saaja cua sequequiaari: “Janiyacujaari quia cumaquiniutianiyani, cua panishano pueyano quia quiniuucua. Saaja cunocujaari quiara. Cua naatacujaaari socua jiyanohua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacujitij, Cristo cumaacaari socua janiyajinia niquishaaquiaa poonijiyano. <sup>10</sup> Naacujitij, janiyari shuquiriquiaani cumaacaaju

pueyano cua quiniuucua, Pueyaso cumaquiniuria janiya. Naacuajitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jiitiaaquiriqiani, naajaa. Pueyaso cumaquishacari janiya, janiyari juhuajaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacarijuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacuajitij, janiya jaara tojetaarucujanaa cumaacaaju quiquiaani, janiyari jiyacari socua jiyanohua cumaacaraca quiquiaani, Pueyaso cumaquiniuucua janiya.

*Pablo tacaashacari Corinto tiacajinia quiniaa Pueyaso muerasu maanuucua*

<sup>11</sup> Janiyari seetanujuanaa juhua paateca tama janiya-jinijijiaaja pohuatareeni, juhua pueya shocotaja. Niaacuajaari naa cua pohuaterree, niaacuaja naara cucuaji tacuyaquiquianu cua sesacaja pueyatej. Janiyanaari najuhua quijia pueyanoni. Naajaa, niaacuajaari niishiya, janiyari maja socua najuhua quijia cuno pojorijini-jini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. <sup>12</sup> Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miiqioquiaari Pueyaso cumaacata nia niquiarani. Niaari nocuaji jiuujiatecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. <sup>13</sup> ¿Janiyateeri sesa nia jiitiquiaarini, Pueyaso rupaa cua niishitiojosacari nijaniya? ¡Maja! Janiyari nia miiquiaari maniniani, naajuhuj, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu

quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajiniji. ¡Cua jiyanoori cunora, jaara sesa quiquiaari niajaniyara!

<sup>14</sup> Quiarrijiani, janiyacujaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacujitij, cua mashiniquijiyacquishacari cumaneeca niajaniyajiniji, janiyari seetanujuanaa juhua nia queni. <sup>15</sup> Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaniya. Naacujitij, janiyari tama cua cumaacajaaja puecanutaniyajuhuj, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

<sup>16</sup> Niaacuajaari niishiya, majaari quenaaja nia niquitionu quijia nia cumaneeca janiya. Naajaa, tamasaca niajaniyajinijinionaari soquecoya, janiya naasucuaanaari jiyasohuaja nia cumaneeca nohuasejoquiaani, cua sapojonuta niajaniya. <sup>17</sup> ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! <sup>18</sup> Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanojuhuaj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuajaari cumaneecaacua jiaatiashijia, juhua janiyajuhuj. Janiya Titota, canacuajaari

jiyanohua nia paniquiaani.

<sup>19</sup> Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuajijiaaja tacuyani, juhua canaa nequesoreena nia quishacari. Saniniuujia, canaari niya Pueyaso niquiara nio naajiya niaacuarani, Cristo pueya canaa quiniuucua. Naajuhuj, puetunu cua sequesanojuanaa nijaniya nio cua naajiojiniani, cunoori cua cumaquiniuria nijaniya cua panishano pueyanaa. Janiyari naa nia nacasuyani, seetanujuanaa Jesucristo tojjijaca nia quiniuria. <sup>20</sup> Janiyari puereyani, niaacua cua tiuquishacari, janiyari niaacua taraajenutaniyani cua riuriasacari nijaniya sesa quiyanojua, maja maninia taa cua paniriquiaacuajani. Janiya jaara nia riuriatasee naa sesa quiyanojuani, jecatoojua, niaari saniniuujia taraajenutaniya nia niishishacari taa cua miiniutianiya nijaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiitiasanoocua jiaatiajaca quiyajaa. Niaa naasucuaari juaaniu porocua quiyajaa. Niaa naasucuaari tama nia panishanojuaaja miijiaca quiyajaa. Niaa naasucuaari niarta pueyacuara coriaacojuaca quiyajuhuj. Naajuhuj, niaa naasucuaari niarta pueyacuara rimiaaquenuujuaca quiyajaa. Naajuhuj, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhuj, pueyaracaanu nia juayonuujutanuucua. <sup>21</sup> Naacujitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhuj, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaquiquianujua. Noojiaqueya nijaniyajininioori sacuaraatia miijiaca quiquianujua: cararaatia miijiaca sacuaraatia, na camishoo maaji

numuetucunu porocujuhuj, naajuhuj, majaari tama nojori cuaequeya panishanojuaja nojori rejetenu quiquiaa.

## 13

### *Socua Pablo nacasusacari Pueyaso pueya*

<sup>1</sup> Nioori quiniutianiya jiuujianaraca cua pacutesacari quianu niaacua. Tariucuacaanu Pueyaso rupaajinia, paari nio niishitiojosaaquiaarini: querajaa pueya jaara mariyata pohuatate nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuj, niaacua cua tiuquishacari, janiyari naa miiniutianiyanu cua nequesoreesacari cuno sesa miijiacaa. <sup>2</sup> Pueyanaa, janiya jaara pacutequiaariuhua niaacua quianutej, janiyacuaajaari puetunu nijaniyajinijino cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. <sup>3</sup> Cua nequesoreesacari cuno sesa miijiacaa, niaari jiyacari niishiniutianiya janiyari seetanujuanaa Cristo sequesano caminiujiuniani, taa nia niishiniu paniriquiaacuajiani. Niaacuajaari tari niishiya, pa Jiyaniijia Cristoori maja na jiitianu nijaniya juhua cumaacaaju pueyano. Niaacuajaari na cumaaca niquiquiaa tama nijaniyajinijaaja na sanitiosacari nijaniya. <sup>4</sup> Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuujia, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiitiaa. Naajuhuj, canaa, na rupaa pohuatanaani, canaari naquiya miishaaquiaajaniuhua saaja mijiria quiniaa canaa quiniuucua, taa nojuaja quiquiaaricuaani. Saniniuujia, Cristo rupuesano canaa quishacari quiarijiani, canaa

cutaraari Pueyaso cumaacaracani, maninia canaa jiitia-nura niajaniya.

<sup>5</sup> Naarate pueyanaa, jacaria nia niishiriojore, ¿ni-aate seetanujuanaa Jesucristoocua tiuujiaa, maja soj? ¿Niaate maninia miijiaca taa Pueyaso muerasu mi-iquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujiaa quiri, nojuajaari nioojiajinia quiya? <sup>6</sup> Naajuhuj, jacaria nia niishiriojore canaajiniji. Nia niishitiriquiani, canaari seetanujuanaa Jesucristo jiyaramiquishano pueyani, maja sapojonuu-juaca. <sup>7</sup> Canaari Pueyaso secojoquiaa niaacuarani, toje-taarucuajanaa sesa miyashijiaca nia quiniuria, maninia Pueyaso muerasu nia quiniuria. Majaari naa canaa sec-ohonu quiquiaa saaja pueya niishiniuria canaa seetan-juanaa Jesucristo jiyaramiquishano pueyani. Canaari saaja nia panitiaa cutarani, maninia miijiaca nia quini-uria Pueyasora. Niaa jaara naa maninia miijiacara quiriohua, majaari canaa saniitionu quiniutianiya nia-janiya Pueyaso cumaacata. Naacuajitij, majaari pueya niquiniu quiniutianiya Pueyaso cumaaca canaa jiitiasano. Naajaa, pueya jaara jiyaniya canaa najuhuana quijiaca pueyani, naajaa. <sup>8</sup> Canaa jiitiasano cumaacaari maja canaa saniitiotajara seetanujuanaa Pueyaso rupaa toji-tiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojitiajaca nia quiniuria. <sup>9</sup> Naacuajitij, canaari shuquiriquiaani ni-aacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojitiaashijiaca quiriquia. Naacuajitij, canaari juhua cumaacaaju pueya niquishano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso sec-jojoquiaani, tojetaarucuajanaa maninia miijiaca Pueyaso muerasu nia quiniuria seetanujuanaa. <sup>10</sup> Janiyari nio cua naajioneerjina jiyanohua nia nacasuyani tucuacaanu cua quishacarijia, maja jiyanohua cua nacasunura niajaniya,

niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niqitiosano na cumaaca janiyari maja cua sesonura niajaniya.

<sup>11</sup> Cua tucuatatura nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniuucua jiaatijaca nia quiri. Nioojia nia cumaquiri, maninia cua rootasanota. Naajuhuj, nia jiyanootiooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhaj. <sup>12</sup> Pueyanaa, Pueyaso tojjijaca nia quiniuucua, nia saruhuajotooriquia nujuunuta, seetanujuanaa nia paniniutia niarta Pueyaso pueya. <sup>13</sup> Puetunu niqijinio parta Pueyaso muerasujuanaari cua sequeya cua saruhuatanura niajaniya.

<sup>14</sup> Pa Jiyaniijia Jesucristo cuaara cumaquiiria niajaniya pueyaracaanu. Niajaniya cuaara quiiria pa Que Pueyaso panishano pueyaracaanujuhuj. Naajuhuj, niaa cuaara quiiria Pueyaso Sohanu rupuesano pueyaracaanu. Puetunu niajaniyajanaa cuaara naa quiiria.

Quiarinio pueyaso rupaa pa jiyaniijia Jesucristojiniji  
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---



